

TREND DAN FAKTOR PERCERAIAN RUMAH TANGGA DI NEGERI SELANGOR DARI TAHUN 2011 HINGGA 2015

Mariam Abd. Majid, Mohammad Syafirul Zarif Saleh Hudin
Kolej Universiti Islam Antarabangsa Selangor

mariam@kuis.edu.my

ABSTRAK

Perkahwinan merupakan suatu jalan suci yang mengikat pasangan suami dan isteri, namun apabila ianya gagal dipertahankan, ramai pasangan mengambil keputusan mengakhiri perkahwinan mereka dengan perpisahan atau perceraian rumah tangga. Kajian ini dibuat bertujuan bagi mengenal pasti trend dan faktor perceraian rumah tangga dalam kalangan pasangan suami isteri di Negeri Selangor dari tahun 2011 hingga 2015. Data kajian ini diperolehi menerusi metode dokumentasi dan temubual. Trend perceraian dikemukakan dari tahun 2011 hingga 2015 mengikut kategori jantina, umur perkahwinan serta umur suami dan isteri manakala faktor perceraian dikemukakan berdasarkan data aduan di Jabatan Agama Islam Selangor. Data yang diperolehi dianalisis secara kuantitatif dan dikemukakan dalam bentuk kekerapan dan peratusan. Hasil kajian menunjukkan bahawa terdapat peningkatan kadar perceraian dari tahun 2011 hingga ke tahun 2015 yang direkod di Negeri Selangor. Kes-kes perceraian pasangan suami berlaku adalah berbeza mengikut kategori jantina, umur perkahwinan serta umur suami dan isteri. Pengabaian tanggungjawab antara pasangan merupakan faktor paling tinggi berlakunya perceraian rumah tangga dalam kalangan pasangan suami isteri di Negeri Selangor diikuti dengan faktor masalah komunikasi, akhlak dan sosial, campurtangan pihak ketiga, lemah didikan agama, ekonomi, seksual, kerjaya, kesihatan dan faktor yang paling rendah ialah disebabkan perbezaan budaya. Pelbagai pendekatan dan kerjasama semua pihak penting digembleng bagi membendung isu perceraian ini daripada terus meningkat.

Kata kunci: Trend perceraian, Faktor perceraian, Rumah tangga, Negeri Selangor, dari tahun 2011 hingga 2015

1. PENDAHULUAN

Perkahwinan disyariatkan oleh Allah SWT dalam Islam bertujuan mencapai beroleh kasih sayang dan rahmat. Firman Allah SWT dalam surah al-Rum, ayat 21 menjelaskan berkaitan tujuan perkahwinan iaitu:

وَمِنْ آيَاتِهِ أَنْ خَلَقَ لَكُمْ مِنْ أَنْفُسِكُمْ أَزْوَاجًا لِتَسْكُنُوا إِلَيْهَا وَجَعَلَ
بَيْنَكُمْ مَوَدَّةً وَرَحْمَةً إِنَّ فِي ذَلِكَ لَآيَاتٍ لِقَوْمٍ يَتَفَكَّرُونَ^{٢١}

“Dan di antara tanda-tanda yang membuktikan kekuasaannya dan rahmatNya, bahawa ia menciptakan untuk kamu (wahai kaum lelaki), isteri-isteri dari jenis kamu sendiri, supaya kamu bersenang hati dan hidup mesra dengannya, dan dijadikannya di antara kamu (suami isteri) perasaan kasih sayang dan belas kasihan. Sesungguhnya yang demikian itu mengandungi keterangan-keterangan (yang menimbulkan kesedaran) bagi orang-orang yang berfikir.”

Ayat di atas menjelaskan bahawa Allah SWT menciptakan pasangan bagi manusia bertujuan mendapat ketenangan serta beroleh kasih sayang dan rahmat. Pasangan suami dan isteri haruslah memainkan peranan dan bertanggungjawab masing-masing dalam usaha mencapai matlamat perkahwinan seperti yang dijelaskan menerusi ayat tersebut di atas. Sifat *mawaddah* dan *rahmah* dalam rumah tangga direalisasikan menerusi sikap saling menjaga, saling melindungi, saling membantu, saling memahami hak dan kewajiban masing-masing.

Ikatan perkahwinan merupakan persetujuan berkaitan hak serta kewajipan kedua pasangan suami dan isteri secara dua hala yang seimbang dan adil. Perkahwinan adalah suatu lambang kehormatan dan kemuliaan yang memberi perlindungan kepada pasangan suami dan isteri ibarat pakaian yang menutupi aurat dan member perlindungan kepada manusia, harus saling menutupi kekurangan pasangannya dan saling membantu untuk memberi perbuatan yang terbaik.

Rumahtangga dan sistem kekeluargaan merupakan asas kepada pembentukan sebuah masyarakat yang baik dan harmoni. Ini kerana masyarakat yang baik jelas terbina daripada keluarga yang terdidik dengan baik. Sebaliknya, perkahwinan yang mereka nikmati akan bertukar menjadi duka dan kesedihan ekoran masalah ketidaksefahaman yang berlaku dalam kalangan suami dan isteri seperti sikap suka menyalahkan sesama sendiri dan cuba melepaskan tanggungjawab kepada salah seorang daripada mereka. Oleh yang demikian, sekiranya ia tidak dapat ditangani dengan bijak dan matang, dibimbangkan akan berlaku keruntuhan yang boleh membawa perceraian. Demikianlah, masalah kepincangan yang berlaku dalam masyarakat boleh menjadi salah satu faktor penyumbang terhadap berlakunya keretakan sesebuah rumahtangga (Abe Sophian et.al, 2014).

Faktor kekukuhan ikatan kekeluargaan turut penting bagi menjamin kelangsungan terhadap usaha melahirkan generasi masyarakat yang terdidik dengan roh Islam yang mampu mengamalkan nilai-nilai rabbani dalam kehidupan mereka. Sebaliknya konflik yang tercetus merupakan antara halangan dan cabaran bagi pasangan suami dan isteri untuk mengekalkan kebahagiaan rumah tangga. Apabila rumah tangga dibina gagal dipertahankan ramai pasangan mengambil keputusan mengakhiri perkahwinan mereka dengan perpisahan atau bercerai (Raihanah Abdullah, 2001). Perkahwinan yang diasaskan kepada syariat Islam berupaya mewujudkan sebuah rumahtangga yang aman, damai dan tenteram.

2. PERNYATAAN MASALAH

Isu perceraian ini sering dibincangkan dalam pelbagai media dan sesi diskusi ilmiah. Statistik perceraian rumah tangga meningkat tahun demi tahun. Pada tahun 2007 statistik perceraian yang dikeluarkan oleh Jabatan Kemajuan Islam Malaysia (JAKIM) adalah sebanyak 20,529. Ini bermakna sebanyak 56 pasangan yang bercerai setiap hari. Pada tahun 2016 pula, sebanyak 48,077 kes perceraian melibatkan pasangan beragama Islam direkodkan sejak Januari hingga Julai iaitu hampir 50,000. Timbalan Menteri Pembangunan Wanita, Keluarga dan Masyarakat Datuk Azizah Mohd Dun berkata daripada jumlah itu, 3 negeri yang mencatatkan kes tertinggi adalah Selangor (7,731) diikuti Sabah (6,638) dan Johor (4,700).

Perceraian sering berlaku apabila masalah yang dihadapi oleh sesebuah perkahwinan menemui jalan buntu dan tidak mendapat sebarang penyelesaian atau kedua-dua pihak gagal menyelamatkan ikatan perkahwinan mereka (Siti Zalikhah Md. Nor, 2005). Dalam satu kajian yang dilakukan di Sabah mendapati bahawa pengabaian tanggungjawab antara pasangan merupakan faktor dalaman paling utama berlakunya perceraian (Sabariah Binti Baharum, 1989). Mahkamah Syariah Perlis merekodkan bahawa antara punca utama berlaku perceraian adalah kerana tiada persefahaman antara pasangan. Bagaimanapun alasan yang diberikan adalah tidak jelas

memandangkan pasangan tersebut sebenarnya mempunyai alasan tersendiri yang menyebabkan mereka perlu bercerai (Raihanah Hj. Abdullah, 2001).

Antara persoalan berkaitan perceraian timbul antaranya apakah usia muda menjadi punca utama berlaku perceraian atau usia perkahwinan? Kajian Abe Sophia mendapati golongan pasangan suami atau isteri yang berusia di antara usia 27-37 tahun adalah golongan tertinggi berlaku perceraian iaitu sebanyak 166 orang (47%). Menurut Menteri Pembangunan Wanita, Keluarga dan Masyarakat bahawa kebanyakan kes perceraian yang direkodkan di Malaysia melibatkan usia perkahwinan lima tahun ke bawah (Berita Harian, 2016).

Statistik dan faktor permasalahan perceraian yang berlaku dalam kalangan pasangan suami dan isteri ini mungkin berbeza di antara satu tempat dengan tempat yang lain. Justeru, artikel ini bertujuan mengemukakan trend perceraian rumah tangga di Negeri Selangor berdasarkan usia suami dan isteri serta usia perkahwinan bagi pasangan dari tahun 2011 sehingga tahun 2015. Selain itu, artikel ini turut mengenengahkan faktor-faktor yang menyumbang kepada aduan perceraian dalam kalangan pasangan suami dan isteri yang direkod di Jabatan Agama Islam Negeri Selangor. Adalah diharapkan dapatan ini dapat dimanfaatkan oleh semua pihak bagi merancang pelbagai usaha dalam menangani dan mengurangkan permasalahan berkaitan perceraian rumah tangga di Negeri Selangor.

3. FAKTOR PERCERAIAN RUMAH TANGGA

Terdapat beberapa kajian-kajian telah dilakukan menunjukkan wujudnya pelbagai faktor berlakunya masalah perceraian rumah tangga antaranya kegagalan dalam memahami tanggungjawab yang telah digariskan oleh Islam. Kajian bertajuk “Masalah Perceraian di Kalangan Masyarakat Islam di Sabah: Satu Kajian di Daerah Tawau”, membincangkan tentang isu perceraian yang berlaku dalam kalangan masyarakat Islam di Daerah Tawau, Sabah. Kajian dilakukan bertujuan mencari antara punca perceraian, kadar dan bilangan perceraian yang berlaku di mahkamah, kesan-kesan daripada perceraian serta mencadangkan langkah bagi mengatasi masalah perceraian dalam kalangan masyarakat Islam di Tawau, Sabah. Pengabaian tanggungjawab didapati antara faktor berlaku masalah perceraian seperti suami meninggalkan isteri tanpa berita (Sabariah Binti Baharum, 1989).

Majoriti orang-orang Melayu masa ini kurang mengambil berat tugas serta tanggungjawab mereka untuk membina dan membentuk keluarga muslim yang sebenar. Wujud pelbagai faktor yang telah, sedang dan akan menyebabkan mereka lupa dan lalai terhadap tugas serta tanggungjawab tersebut (Saedah Siraj, 2001)

Kajian mendapati salah satu faktor menjadi sebab berlakunya perceraian ialah wujudnya perasaan cemburu pasangan yang berlebihan (Roslee bin Haji Abbas, 1999). Fenomena ini menjadi lebih kronik apabila berlaku pergaduhan ekoran pihak suami atau isteri tidak menjaga batasan dan bebas dalam pergaulan mereka sewaktu keluar bekerja. Golongan isteri harus tahu mengimbangi tugasan di tempat kerja dan peranan dalam rumah tangga. Kedudukan peranan golongan wanita bukan sahaja diperlukan dalam kerjaya malahan juga diperlukan dalam rumah tangga (Rohaiza, 2011)

Perselisihan dan ketidak kesefahaman yang selalu berlaku di antara suami dan isteri turut menjadi sebab berlakunya pertengkar dan pergaduhan. Jika keadaan ini sudah tidak dapat dielakkan, maka menjatuhkan talak adalah tindakan terakhir bagi memberi ketenangan dan juga kedamaian hati bagi kedua-dua belah pihak (Abdullah, 2013).

Teknologi komunikasi maklumat (ICT) berperanan membangunkan dan membina tamadun baru manusia sejagat namun sebaliknya memberi impak negatif jika disalahgunakan (Zulkiple, 2001). Penyalahgunaan kecanggihan ICT seperti penggunaan Facebook kini dikenalpasti sebagai salah satu punca timbulnya beberapa kes perceraian. Menurut Peguam syarie daripada Jabatan Bantuan Guaman Kuching Mohd Zamri Abdul Hazis, terdapat dua kes perceraian di Bintulu dan satu kes di Kuching berlaku berpunca daripada penggunaan laman sosial iaitu Facebook. Menurut beliau, perbuatan mendedahkan hal berkaitan rumah tangga di laman sosial seperti Facebook bukan sahaja memalukan pihak lain (suami atau isteri) tetapi menjadi punca yang mampu menjurus kepada keruntuhan perkahwinan (Abe Sophian et.al, 2014). Pakar psikologi dan Dekan Fakulti Pendidikan Universiti Malaya, Prof Madya Dr Mariani Mohd Nor berkata bahawa aplikasi seperti WhatsApp kini menjadi platform bagi pasangan muda meluahkan perasaan marah apabila berhadapan konflik rumah tangga (Berita Harian, 2016). Implikasinya, teknologi yang semakin berkembang ini telah menjadi antara faktor yang menyumbang kepada pembentukan konflik dalam rumahtangga. .

Fasakh merupakan antara kaedah perceraian yang berlaku dalam kalangan pasangan suami isteri. Kajian bertajuk “Fasakh di dalam Enakmen Undang-undang Pentadbiran Keluarga Islam (Negeri Terengganu) Tahun 1985 di Mahkamah Tinggi Syariah Terengganu” telah menganalisis kes-kes fasakh di Mahkamah Tinggi Syariah Terengganu dari tahun 2000 hingga 2009 serta faktor berlakunya fasakh dalam kalangan masyarakat Islam di Terengganu. Kajian mendapati faktor utama berlakunya kes fasakh adalah disebabkan penglibatan penggunaan dadah dan juga berlaku poligami yang tidak diresdai (Nur Juwariyah Binti Mohammed, 2011).

Selain itu, perceraian seringkali juga berlaku atas sebab-sebab yang remeh dan sukar diterima akal seperti tiada keserasian dan berbeza fahaman politik, suami keluar bekerja tidak tentu masa, pasangan terlalu cerewet dan sebagainya. Semua masalah ini bermula daripada wujudnya perasaan pendam dan marah sehingga menyebabkan pertengkar dan pertelingkahan (Haji Mohd Saleh, 2009).

Kajian bertajuk “Kesan Pendapatan ke atas Kadar Perceraian Di Kalangan Masyarakat Melayu di Kelantan” telah mengkaji kesan pendapatan ke atas kadar perceraian dalam kalangan masyarakat Melayu di negeri Kelantan. Objektif utama kajian tersebut ialah melihat sejauh mana kesan pendapatan ke atas kadar perceraian. Sebanyak 20 sampel kes di sembilan jajahan di Kelantan telah diambil dan dianalisis. Dapatan kajian yang diperolehi mendapati terdapat hubung kait yang ketara di antara pendapatan dengan kadar perceraian. Kajian ini mendapati golongan yang berpendapatan rendah merupakan golongan yang teramai terlibat dengan perceraian (Masnah Mohd Zain et.al, 2002). Perkembangan ekonomi yang berlaku secara tidak langsung membawa kepada pertambahan bebanan, peranan serta komitmen yang menyebabkan tekanan (Rohaiza, 2011). Tekanan yang dihadapi oleh pasangan suami atau isteri jika tidak

dapat dikawal boleh menjadi salah satu punca yang boleh membabitkan keretakan dalam rumah tangga.

Pelbagai kaedah telah dilakukan Jabatan Kemajuan Islam Malaysia (JAKIM) dan Jabatan Agama Islam Negeri (JAIN) di seluruh Malaysia bagi menangani masalah perceraian ini antaranya kursus pra-perkahwinan, kursus pasca perkahwinan, program-program, seminar dan forum berkaitan dengan kekeluargaan namun sehingga kini masalah dan kadar perceraian didapati terus meningkat setiap tahun. Oleh yang demikian, artikel ini bertujuan mengemukakan dapatan kajian berkaitan trend perceraian rumah tangga di Negeri Selangor berdasarkan usia suami dan isteri serta usia perkahwinan bagi pasangan dan faktor-faktor yang menyumbang berlakunya perceraian selama lima tahun bermula tahun 2011 hingga tahun 2015 di Negeri Selangor Darul Ehsan.

4. METODOLOGI KAJIAN

Data bagi kajian ini didapati menerusi metode dokumentasi dan temubual. Dokumen diperolehi menerusi dokumen manakala temu bual ini dilakukan bersama pegawai di Bahagian Undang-Undang Keluarga JAIS serta mereka yang terlibat secara langsung berkaitan kajian. Semua dokumen yang diperolehi dianalisis dan direkod dalam bentuk fakta dan statistik manakala transkripsi temubual berkaitan maklumat kes-kes aduan permasalahan rumah tangga di Jabatan Agama Islam Selangor (JAIS) dianalisis secara manual.

5. DAPATAN KAJIAN

Terdapat peningkatan jumlah kes perceraian yang berlaku dalam masyarakat dari tahun ke tahun. Berikut adalah kes perceraian yang berlaku dari tahun 2011 sehingga 2015 di Negeri Selangor Darul Ehsan.

5.1. Statistik Kes Perceraian 2011-2015

Berikut adalah statistik dan trend kes perceraian rumahtangga yang direkod bermula pada tahun 2011 sehingga tahun 2015 di Negeri Selangor Darul Ehsan.

Jadual 1: Statistik Kes Perceraian Tahun 2011-2015 Di Selangor

| TAHUN | JUMLAH PASANGAN BERCERAI |
|--------|--------------------------|
| 2011 | 5,694 |
| 2012 | 6,098 |
| 2013 | 6,083 |
| 2014 | 6,928 |
| 2015 | 8,167 |
| Jumlah | 32,970 |

Sumber: Jabatan Agama Islam Selangor (JAIS), 2017

Berdasarkan jadual 1, didapati terdapat peningkatan jumlah kes perceraian yang didaftarkan di Jabatan Agama Islam Selangor (JAIS) bermula tahun 2011 sehingga 2015. Terdapat sebanyak 5,694 kes pasangan bercerai yang berlaku pada tahun 2011.

Bilangan kes perceraian ini telah meningkat secara mendadak pada tahun 2015 iaitu kepada sebanyak 8,167 kes. Bilangan ini menunjukkan bahawa sebanyak 2,473 kes perceraian telah berlaku dan didaftarkan di JAIS Selangor sepanjang 5 tahun iaitu dari 2011 hingga pada tahun 2015.

5.2 Bilangan pasangan suami/isteri bercerai mengikut julat umur mengikut tahun 2011-2015

Data seterusnya mengemukakan bilangan pasangan suami atau isteri bercerai mengikut julat umur pasangan selama 5 tahun bermula pada tahun 2011 sehingga 2015.

Jadual 2: Julat Umur Pasangan Suami/Isteri Bercerai Pada Tahun 2011

| UMUR | JANTINA | | JUMLAH |
|------------|---------|-----------|---------|
| | LELAKI | PEREMPUAN | |
| 18 kebawah | | | |
| 16 kebawah | | 2 | 2 |
| 17-20 | | 87 | 87 |
| 19-20 | 21 | | 21 |
| 21-25 | 309 | 576 | 885 |
| 26-30 | 1,085 | 1,367 | 2,452 |
| 31-35 | 1,243 | 1,272 | 2,515 |
| 36-40 | 1,070 | 952 | 2,022 |
| 41-45 | 816 | 587 | 1,403 |
| 46-50 | 538 | 419 | 957 |
| 51-55 | 331 | 230 | 561 |
| 56 keatas | 317 | 166 | 483 |
| Jumlah | 5,730 | 5658 | 11,388 |
| Peratus | 50.30% | 49.70% | 100.00% |

Sumber: Jabatan Agama Islam Selangor (JAIS), 2011

Berdasarkan jadual 2 diatas, bilangan pasangan suami atau isteri bercerai yang direkodkan di JAIS Selangor pada tahun 2011, julat umur tertinggi pasangan suami/isteri bercerai adalah berumur di antara 31-35 tahun iaitu sebanyak 22.3% (2,515 orang) daripada jumlah keseluruhan pasangan suami atau isteri yang bercerai iaitu 11,388 orang pada tahun 2011.

Jadual 3: Julat Umur Pasangan Suami/Isteri Bercerai Pada Tahun 2012

| UMUR | JANTINA | | JUMLAH |
|------------|---------|-----------|--------|
| | LELAKI | PEREMPUAN | |
| 18 kebawah | 16 | | |
| 16 kebawah | | 1 | 1 |
| 17-20 | | 214 | 214 |
| 19-20 | 77 | | 77 |
| 21-25 | 503 | 749 | 1,252 |
| 26-30 | 1,203 | 1,446 | 2,649 |
| 31-35 | 1,221 | 1,306 | 2,527 |
| 36-40 | 1,128 | 1030 | 2,158 |
| 41-45 | 738 | 664 | 1,402 |
| 46-50 | 510 | 387 | 897 |
| 51-55 | 315 | 245 | 560 |
| 56 keatas | 307 | 136 | 443 |
| jumlah | 6,018 | 6178 | 12,196 |

| | | | |
|---------|--------|--------|---------|
| peratus | 49.30% | 50.70% | 100.00% |
|---------|--------|--------|---------|

Sumber: Jabatan Agama Islam Selangor (JAIS), 2012

Jadual 3 diatas menunjukkan bilangan pasangan suami atau isteri bercerai yang direkodkan di JAIS Selangor pada tahun 2012, julat umur tertinggi pasangan suami atau isteri bercerai adalah berumur di antara 26-30 tahun iaitu sebanyak 21.7% (seramai 2,649 orang) berbanding julat umur tertinggi pada 2011 adalah pada usia 31-35 tahun daripada jumlah keseluruhan pasangan suami atau isteri yang bercerai iaitu 12,196 orang pada tahun 2012 yang meningkat sebanyak 808 orang.

Jadual 4: Julat Umur Pasangan Bercerai Pada Tahun 2013

| UMUR | JANTINA | | JUMLAH |
|------------|---------|-----------|---------|
| | LELAKI | PEREMPUAN | |
| 18 kebawah | 1 | | 1 |
| 16 kebawah | | 4 | 4 |
| 17-20 | | 485 | 485 |
| 19-20 | 92 | | 92 |
| 21-25 | 776 | 942 | 1,718 |
| 26-30 | 1,055 | 1,054 | 2,109 |
| 31-35 | 1,215 | 1,279 | 2,494 |
| 36-40 | 843 | 749 | 1,592 |
| 41-45 | 657 | 648 | 1,305 |
| 46-50 | 578 | 443 | 1,021 |
| 51-55 | 319 | 256 | 575 |
| 56 keatas | 268 | 145 | 413 |
| jumlah | 5,804 | 6005 | 11,809 |
| peratus | 49.10% | 50.90% | 100.00% |

Sumber: Jabatan Agama Islam Selangor (JAIS), 2013

Pada tahun 2013, dapatan kajian dalam jadual 4 menunjukkan julat umur tertinggi pasangan suami dan isteri yang bercerai adalah pada usia 31-35 tahun iaitu sebanyak 21.1% (seramai 2,494 orang) berbanding julat umur tertinggi pada 2012 adalah pada usia 26-30 tahun. Pada tahun 2013 ini, jumlah mereka yang bercerai menurun sedikit iaitu seramai 11,809 orang berbanding 12,196 orang pada tahun sebelumnya.

Jadual 5: Statistik Perceraian Mengikut Umur Pada Tahun 2014

| UMUR | JANTINA | | JUMLAH |
|------------|---------|-----------|--------|
| | LELAKI | PEREMPUAN | |
| 18 kebawah | 4 | | 4 |
| 16 kebawah | | 6 | 6 |
| 17-20 | | 104 | 104 |
| 19-20 | 34 | | 34 |
| 21-25 | 362 | 665 | 1,027 |
| 26-30 | 1,177 | 1,483 | 2,660 |
| 31-35 | 1,527 | 1,645 | 3,172 |
| 36-40 | 1,308 | 1,183 | 2,491 |

| | | | |
|-----------|--------|--------|---------|
| 41-45 | 946 | 816 | 1,762 |
| 46-50 | 691 | 522 | 1,213 |
| 51-55 | 445 | 282 | 727 |
| 56 keatas | 435 | 221 | 656 |
| jumlah | 6,929 | 6927 | 13,856 |
| peratus | 50.00% | 50.00% | 100.00% |

Sumber: Jabatan Agama Islam Selangor (JAIS), 2014

Jadual 5 pula menunjukkan julat umur tertinggi pasangan suami/isteri bercerai adalah kekal iaitu yang berumur di antara 31 hingga 35 tahun dengan jumlah peratusan 22.9% atau seramai 3,172 orang. Pada tahun 2014 kadar mereka yang bercerai meningkat secara mendadak dengan jumlah keseluruhan 13,856 orang iaitu meningkat sebanyak 2,047 orang.

Jadual 6: Statistik Perceraian Mengikut Umur Pada Tahun 2015

| UMUR | JANTINA | | JUMLAH |
|------------|---------|-----------|---------|
| | LELAKI | PEREMPUAN | |
| 18 kebawah | | | |
| 16 kebawah | | 1 | 1 |
| 17-20 | | 113 | 113 |
| 19-20 | 26 | | 34 |
| 21-25 | 357 | 751 | 1,108 |
| 26-30 | 1,280 | 1,776 | 3,056 |
| 31-35 | 1,798 | 1,879 | 3,677 |
| 36-40 | 1,498 | 1,427 | 2,925 |
| 41-45 | 1,239 | 1,021 | 2,260 |
| 46-50 | 880 | 638 | 1,518 |
| 51-55 | 491 | 347 | 838 |
| 56 keatas | 561 | 251 | 812 |
| jumlah | 8,130 | 8204 | 16,334 |
| peratus | 49.80% | 50.20% | 100.00% |

Sumber: Jabatan Agama Islam Selangor (JAIS), 2015

Berdasarkan jadual 6, pada tahun 2015, julat usia tertinggi perceraian adalah juga golongan yang berumur 31 hingga ke 35 tahun sebanyak 22.5% (seramai 3,677). Merujuk kepada dapatan statistik ini, mendapati hampir kesemua pasangan dalam pelbagai peringkat julat umur berhadapan dengan isu perceraian. Kajian menunjukkan bahawa julat usia pasangan suami dan isteri yang berisiko tinggi bercerai adalah mereka yang berusia di antara 26 hingga 40 tahun manakala julat umur tertinggi yang direkodkan adalah pasangan suami isteri yang berusia di antara 31 hingga 35 tahun. Jadual menunjukkan bahawa, jumlah pasangan bercerai pada 2015 terus meningkat naik dari tahun sebelumnya iaitu seramai 16,334 orang suami atau isteri. Ini menjadikan tahun 2015 mencatatkan jumlah perceraian paling tinggi sepanjang lima tahun dari 2011 sehingga 2015 iaitu peningkatan sebanyak 2,478 orang.

5.3 Kes Perceraian 2011-2015 Mengikut Usia Perkahwinan

Dapatan seterusnya akan mengemukakan kes perceraian yang direkodkan bermula tahun 2011 hingga 2015 mengikut tempoh usia perkahwinan pasangan suami dan isteri.

Jadual 12: Usia Perkahwinan Pasangan Bercerai Dari Tahun 2011-2015

| TAHUN | <1 | 01-5 | 06-10 | 11-15 | 16-20 | 21-25 | 26> |
|----------------|-------|--------|--------|--------|-------|-------|-------|
| 2011 | 310 | 1,889 | 1,526 | 853 | 525 | 302 | 289 |
| 2012 | 339 | 2,031 | 1,514 | 971 | 653 | 291 | 299 |
| 2013 | 353 | 2,039 | 1,454 | 933 | 649 | 347 | 308 |
| 2014 | 412 | 2,437 | 1,675 | 939 | 673 | 399 | 393 |
| 2015 | 503 | 2,884 | 1,955 | 1,129 | 769 | 489 | 438 |
| JUMLAH | 1,917 | 11,280 | 8,124 | 4,825 | 3,269 | 1,828 | 1,727 |
| PERATUS | 5.81% | 34.21% | 24.64% | 14.63% | 9.91% | 5.54% | 5.24% |

Sumber: Jabatan Agama Islam Selangor (JAIS)

Jadual 12 menunjukkan bahawa usia perkahwinan 1 hingga 5 tahun merupakan usia perkahwinan yang tertinggi berhadapan dengan masalah perceraian iaitu sebanyak 11,280 kes (34.21%) dari jumlah keseluruhan kes perceraian tahun 2011 hingga 2015.

Usia perkahwinan pasangan 6 hingga 10 tahun merupakan usia perkahwinan yang kedua tertinggi berhadapan dengan masalah perceraian iaitu sebanyak 8,2124 kes (24.64%) dari jumlah keseluruhan kes perceraian tahun 2011 hingga 2015.

Diikuti pula dengan usia perkahwinan pasangan yang telah berkahwin selama 11 hingga 15 tahun merupakan usia perkahwinan ketiga tertinggi berhadapan dengan perceraian iaitu sebanyak 4,825 kes dengan peratusan 14.63% .

Usia perkahwinan 16 hingga 20 tahun pula adalah usia perkahwinan keempat tertinggi berhadapan dengan perceraian iaitu sebanyak 3,2629 kes (9.91%) dari jumlah keseluruhan kes perceraian tahun 2011 hingga 2015.

Usia perkahwinan kurang dari setahun merupakan yang kelima tertinggi berhadapan dengan masalah perceraian iaitu sebanyak 1,917 kes (5.81%) dari jumlah keseluruhan kes perceraian tahun 2011 hingga 2015.

Usia perkahwinan terendah berlaku kes perceraian dalam tempoh lima tahun bermula 2011 hingga 2015 adalah usia perkahwinan yang melebihi 26 tahun melayari hidup berumahtangga. Iaitu 1,727 kes (5.24%) dari jumlah keseluruhan kes perceraian.

Jadual di atas menunjukkan bahawa alam rumah tangga sentiasa berhadapan dengan risiko berlaku perceraian namun data yang direkod menunjukkan bahawa tempoh usia perkahwinan antara 5 hingga 10 tahun merupakan fasa berisiko dalam menghadapi

saat kemungkinan berlaku perceraian. Namun data ini turut menunjukkan bahawa pasangan yang telah lama mendirikan rumah tangga juga berhadapan dengan masalah perceraian ini.

5.4 Faktor Berlaku Perceraian Rumah Tangga

Berikut adalah faktor berlakunya perceraian rumah tangga berdasarkan aduan yang direkodkan di Jabatan Agama Islam Selangor bermula tahun 2011 hingga 2015. Faktor perceraian yang diajukan ke JAIS telah dikodkan mengikut kategori aduan.

| Nombor aduan | KATEGORI ADUAN |
|--------------|----------------------------|
| 1 | tidak bertanggungjawab |
| 2 | lemah didikan agama |
| 3 | campur tangan pihak ketiga |
| 4 | perbezaan budaya |
| 5 | masalah seksual |
| 6 | masalah ekonomi |
| 7 | masalah kerjaya |
| 8 | masalah kesihatan |
| 9 | masalah akhlak / sosial |
| 10 | masalah komunikasi |

Jadual 13 di bawah menunjukkan data aduan rumah tangga yang diterima dan direkodkan oleh pihak Jabatan Agama Islam Selangor (JAIS) sepanjang lima tahun iaitu dari tahun 2011 hingga tahun 2015.

Jadual 13: Statistik Aduan Rumah Tangga Dari 2011 Sehingga 2015

| TAHUN | 1 | 2 | 3 | 4 | 5 | 6 | 7 | 8 | 9 | 10 |
|---------------|--------|-------|-------|-----|-----|-------|-----|-----|-------|-------|
| NO. ADUAN | | | | | | | | | | |
| 2011 | 2,398 | 410 | 1,058 | 54 | 114 | 313 | 114 | 80 | 857 | 1,459 |
| 2012 | 2,279 | 577 | 964 | 41 | 118 | 230 | 108 | 76 | 973 | 1,458 |
| 2013 | 1,773 | 471 | 908 | 53 | 67 | 321 | 102 | 62 | 1,161 | 1,345 |
| 2014 | 2,211 | 486 | 891 | 38 | 96 | 238 | 56 | 61 | 951 | 1,608 |
| 2015 | 2,138 | 485 | 876 | 37 | 91 | 327 | 82 | 82 | 862 | 1,483 |
| JUMLAH | 10,799 | 2,429 | 4,697 | 223 | 486 | 1,429 | 462 | 361 | 5,798 | 7,353 |

Sumber: Jabatan Agama Islam Selangor (JAIS)

Berdasar jadual 13, pengabaian tanggungjawab antara pasangan merupakan faktor paling tinggi direkod menjadi sebab aduan kes perceraian rumah tangga dalam kalangan pasangan suami isteri di Negeri Selangor iaitu sebanyak 10,799 aduan telah dikemukakan bermula tahun 2011 hingga tahun 2015. Tanggungjawab adalah sesuatu yang penting dalam rumah tangga sama ada tanggungjawab seorang suami terhadap isteri, begitu juga sebaliknya tanggungjawab isteri terhadap suaminya. Menurut temubual bersama pegawai di JAIS, antara contoh pengabaian tanggungjawab ialah tidak memberi nafkah dan sifat malas melaksanakan tanggungjawab di rumah.

Seterusnya, masalah komunikasi merupakan faktor kedua tertinggi aduan dikemukakan iaitu sebanyak 7,353 aduan telah dibuat sepanjang lima tahun. Temubual bersama pegawai di JAIS menjelaskan antara masalah-masalah dalam komunikasi rumah tangga yang berlaku ialah selalu menggunakan bahasa-bahasa kasar terhadap pasangan, tiada persefahaman antara pasangan, berlainan bahasa dan sebagainya.

Masalah akhlak atau sosial turut diadu sebagai faktor ketiga tinggi menyumbang kepada masalah keretakan rumah tangga. Sebanyak 4,798 aduan telah dibuat berkaitan masalah akhlak atau sosial pasangan dalam tempoh 5 tahun iaitu 2011 hingga 2015. Masalah akhlak atau sosial adalah seperti pasangan suka berfoya-foya, homoseksual, marah tanpa sebab, suka berbohong, penagih dadah, ketagih aksi lucah, kaki botol dan sebagainya.

6. KESIMPULAN

Dapatan kajian yang dikemukakan dalam artikel ini menunjukkan berlaku peningkatan bilangan kes perceraian yang berlaku dalam tempoh lima tahun bermula 2011 sehingga 2015 ini adalah suatu trend yang serius dan membimbangkan. Peningkatan sebanyak 2,473 kes perceraian berlaku dalam tempoh selama 5 tahun. Usia pasangan suami atau isteri dalam lingkungan 31 hingga 35 tahun adalah julat umur tertinggi yang direkodkan bercerai manakala usia perkahwinan 1 hingga 5 tahun merupakan fasa tertinggi berlakunya perceraian sepanjang tempoh 5 tahun bermula pada 2011 hingga 2015.

Pelbagai faktor didapati menjadi punca masalah keretakan rumah tangga dalam kalangan pasangan suami dan isteri. Data kajian mendapati, pengabaian tanggungjawab menjadi faktor utama aduan perceraian dikemukakan di JAIS dalam tempoh 5 tahun bermula 2011 hingga 2015. Masalah komunikasi antara pasangan suami dan isteri merupakan faktor kedua tinggi dan diikuti dengan permasalahan akhlak pasangan yang menyumbang berlakunya keretakan dalam rumah tangga.

Faktor campurtangan pihak ketiga, lemahnya didikan agama, masalah ekonomi, seksual, kerjaya, kesihatan serta perbezaan budaya adalah antara faktor lain yang turut direkodkan sebagai penyumbang kepada berlakunya masalah perceraian rumah tangga.

Sehubungan dengan itu, pelbagai pihak perlu memberi tumpuan serius terhadap isu perceraian dalam kalangan pasangan suami dan isteri yang terus meningkat ini. Pendedahan khusus perlu diberikan terhadap usaha penyaluran ilmu pengetahuan terutama ilmu agama, ilmu komunikasi rumah tangga, ilmu psikologi dalam rumah

tangga, pendidikan anak-anak bagi pasangan suami dan isteri. Pengamalan serta meningkatkan amal ibadah yang betul adalah merupakan salah satu kaedah efektif bagi membendung timbulnya masalah dalam rumah tangga sekaligus perceraian dalam kalangan pasangan suami dan isteri.

7. RUJUKAN

- Abe Sophian Abdul Rahman, Zuliza Mohd Kusrin Anwar & Fakhri Omar. (2014). *“Faktor Perceraian Di Mahkamah Syariah Bahagian Mukah, Sarawak dari Tahun 2000 hingga 2010.* Jurnal Islamiyyat. 36 (1) Bangi : Universiti Kebangsaan Malaysia.
- Abdullah Abu Mat Suaud. (2013). *Hakmu Muslimah: Menurut Undang-Undang Keluarga Islam Serta Pelaksanaanya Di Mahkamah Syariah.* Awal Hijrah Enterprise
- Mohd Saleh Haji Ahmad. (2009). *Perkahwinan Dan Perceraian Dalam Islam.* Kuala Lumpur: Pustaka Haji Abdul Majid Sdn Bhd.
- Masnah Mohd Zain, Mohd Zaki Zakaria, Norhayati Samba Mohamed, Roslina Salwani Shukri, & Wan Murshida Wan Hashim. (2002). *Kesan Pendapatan ke Atas Kadar Perceraian di Kalangan Masyarakat Melayu di Kelantan.* Kelantan: UiTM.
- Nur Juwariyah Binti Mohammed. (2011). *Fasakh di dalam Enakmen Undang-undang Pentadbiran Keluarga Islam (Negeri Terengganu) tahun 1985.* Tesis Disertasi, Fakulti Pendidikan, UTM.
- Raihanah Abdullah. (2001). *Wanita, Perceraian dan Mahkamah Syariah Dalam Wanita dan Perundangan Islam.* Kuala Lumpur: Ilmiah Publiser.
- Rohaiza Abd.Rokis. (2013). “Islam And Modernity: A Case Of Muslim Female Engineers In Malaysia”. *Jurnal Of Islam In Asia.* Spl. Issue. (2).
- Roslee bin Haji Abbas. 1999. *Faktor-faktor Penyebab Perceraian Keluarga.* Jurnal Kebajikan: Edisi Ke-21.
- Sabariah Binti Baharum. (1989). *Masalah Perceraian di Kalangan Masyarakat Islam di Sabah: Satu Kajian di Daerah Tawau.* t.tp: t.pt.
- Saedah Siraj. (2001). Pendidikan Rumahtangga. Selangor Alam Pintar Enterprise.
- Siti Zalikhah Md. Noor. (2005). *Jika Sudah Habis Jodoh.* Kuala Lumpur: Dewan Bahasa dan Pustaka.
- Zulkiple Abd. Ghani. (2001). Islam, Komunikasi dan Teknologi Maklumat. Kuala Lumpur: Utusan Publications & Distributors Sdn. Bhd.
- Berita Malaysia*, 2016

Temubual

Temubual bersama Pegawai di Bahagian Undang-Undang Keluarga, Jabatan Agama Islam Selangor (JAIS).